

-ZAJEDNIČKI ŠTAB ORUŽANIH SNAGA BiH-

ORUŽANE SNAGE BOSNE I HERCEGOVINE

(AKTIVNOSTI OS BiH U 2016. GODINI)

Sarajevo 2016. godine

TEKST POVODOM 1. decembra - DANA OS BiH 2016. godine

Oružane snage Bosne i Hercegovine su tokom 2016. godine, kao i u prethodnim godinama, ostvarile zapažene rezultate. Da bi osigurali svoje nesmetano funkcioniranje, Oružane snage BiH su, kroz racionalno planiranje izrazile prioritete i uspješno realizirali postavljene zadatke. Uz maksimalno naprezanje ljudskih i materijalnih resursa, omogućeno je izvršenje svih redovnih i vanrednih aktivnosti, procesa obuke i osigurano plansko i redovno funkcioniranje OS. Bez obzira na poteškoće, kvalitetom i predanim radom, ostvaren je napredak i zapaženi rezultati u izgradnji operativnih sposobnosti, implementaciji modernih NATO normi i standarda, učešću u međunarodnim mirovnim operacijama, jačanju regionalnih odbrambenih inicijativa, operacijama humanitarnog deminiranja, rješavanju viškova naoružanja, municije i minsko-eksplozivnih sredstava (MiMES) kao i u procesu obuke pojedinaca, komandi i jedinica. Na ovaj način Oružane snage BiH su dale svoj doprinos u ostvarenju strateških ciljeva Bosne i Hercegovine – integracije u europske i euroatlantske organizacije.

Brojni su rezultati i uspjesi po kojima su Oružane snage BiH prepoznate i uvažene kako u zemlji tako i inozemstvu od kojih ističemo sljedeće:

Pružanje pomoći civilnim organima i stanovništvu u kriznim i vanrednim situacijama i pomoć lokalnim zajednicama (LZ)

- Pružanje pomoći OS BiH civilnim strukturama realizira se u skladu sa članom 4. Zakona o odbrani u BiH. Tokom 2016. godine Oružane snage Bosne i Hercegovine su bile kontinuirano angažirane i ostvarile su značajne rezultate na planu gašenja požara, medicinskog evakuiranja zrakom, operacija traganja i spašavanja, izvođenje inženjerskih radova u lokalnim zajednicama kao i osiguranje podrške realiziranja različitih kulturnih i sportskih događaja širom BiH.

Tokom realiziranja pomenutih zadataka, OS BiH su bile u prilici da testiraju operativne planove i sposobnosti, imajuće kapacitete i resurse, kao i motiviranost pripadnika da odgovore na izazove i rizike s kojim su se susretali tokom izvršenja i najsloženijih zadataka.

Tako su Oružane snage BiH bile angažirane u operacijama gašenja požara iz zraka helikopterima Mi-8 MTV u općinama Trebinje i Široki Brijeg. Ukupno je u ovim operacijama izvršeno preko 13 sati leta, tokom čega je izbačeno preko 205 tona vode, utrošeno preko 10 425 litara GM-1 i 150 litara D-2 za cisternu za prevoz goriva. Oružane snage BiH su u 2016. godini bile angažirane i po zahtjevima na hitnom medicinskom evakuiranju životno ugroženih civila zračnim putem (MEDEVAC) i to: jedna medicinska evakuacija zračnim putem osobe stradale u sniježnoj lavini na relaciji Bjelašnica - Univerzitetski klinički centar Koševo i dvije medicinske evakuacije pacijenata, jedna iz Kamenice u Tuzlu, a druga iz Konjević Polja u Sarajevo. Za predmetne aktivnosti angažiran je helikopter UH-1H i utrošeno je preko 5,5 sati leta i 1485 litara GM-1. Pored navedenog, OS BiH su bile angažirane u pružanju zrakoplovne podrške, kao što su: zrakoplovna podrška za realizaciju pokazne vježbe za potrebe MUP-a RS-a, izbacivanje padobranaca za potrebe Zrakoplovnog saveza BiH (Aero središte Panorama) u Bihaću, prevoženje VIP delegacije R. Turske na 21. godišnjicu u Srebrenicu, vježba službe traganja i spašavanja u Tesliću (angažman 1 Mi-8 i 2 helikoptera Gazela), pripravnost helikoptera Mi-8 za potrebe MUP RS radi eventualne evakuacije štice osoba tokom otvaranja Ferhadija džamije u Banjaluci, podrška kupa Pet zvijezda za potrebe Padobranskog kluba Banjaluka, podrška pružanju zrakoplovne podrške vježbe „Sadejstvo-Vrba 2016“ angažiranjem helikoptera gazela, angažiranje helikoptera UH-1H za uvježbavanje procedura ukrcavanja/iskrcavanja iz helikoptera i „Rappeling“ za pripadnike Federalne uprave policije, angažiranje helikoptera (UH-1H,

Mi-8 MTV) za zrakoplovnu podršku obuke OS BiH i JSP SIPA, u sklopu podrške realizaciji deminerskih zadataka angažiranje helikoptera u pripravnosti za eventualni prevoz povrijeđenih od radilišta do bolnice. Za nabrojane aktivnosti utrošeno je 15 750 litara GM-1, 60 litara BMB 95, 140 litara D-2 i 30 litara D-4. Nastavljeno je realiziranje obuke i 24-satno dežurstvo 365 dana u godini, s jednom posadom i jednim helikopterom za Službu traganja i spašavanja (STS), koristeći resurse OS BiH za izvršenje obaveza koje proističu iz Ugovora između Ministarstva odbrane BiH i Direkcije za civilno zrakoplovstvo BiH (BHDCA).

OS BiH su neprekidno bile uključene u radove na pomoći civilnim strukturama, angažirajući inženjerske resurse tokom cijele godine. Ovo angažiranje na određenim projektima je još uvijek u toku. Ukupno je zaprimljeno 42 zahtjeva za angažiranje inženjerije na izgradnji ili sanaciji infrastrukturnih objekata. Okončani su radovi u sljedećim lokalnim zajednicama: sanacija više puteva u nekoliko MZ općina Srbac, Prozor/Rama, Teslić, Ustikolina, Goražde, izgradnja vodovoda - Novi Travnik, sanacija dječijih vrtića - Sarajevo i Pale, ustupanje i izgradnja dva mosta uništenih u poplavama - Laktaši, sanacija posljedica od poplava na više lokacija: Gradiška, izgradnja memorijalnog središta „Groblje mira“ - Široki Brijeg, sanacija divlje deponije - MZ Foča - Doboj, sanacija puta od zajedničkog interesa za OS BiH i Šumsko gazdinstvo – Prijedor. Pored toga se radi na gradilištima Foča (probijanje i izgradnja puta desnom obalom u kanjonu rijeke Tare) i Sanski Most (sanacija posljedica poplava na više lokacija), a do kraja godine, ukoliko vremenski uslovi dozvole, planirano je da se otpočnu i radovi na području općine Kreševo i Kostajnica. Iskazano brojkama, iskopano je ili preveženo oko 140 000 m³ zemljišta, uređeno je 60 000 m² površina i izgrađeno je preko 320 000 m puteva. Vrijednost izvedenih radova se procjenjuje na cc 1 000 000 KM. Tokom 2016. godine OS BiH su ostvarivale saradnju s civilnim strukturama i na osnovu toga zaprimljeno je 207 zahtjeva za angažiranje resursa OS BiH trećim osobama. Ljudski i materijalni resursi OS BiH su podržali sljedeće aktivnosti: Sarajevo film festival, Kids festival, Dani otvorenih vrata na lokacijama OS BiH, Una regatta, MESS, 7. međunarodni kick-boxing kup Sarajevo Open, Međunarodni turnir u džudou Borsa Open Mostar, 71. Godišnjica Europskog dana sjećanja na žrtve totalitarnih režima, Krsna slava VRS - Vidovdan, Igman 2016. godine, Bobovac 2016. godine, manifestacija Sarajevska zima i Sarajevske večeri muzike, ustupanja resursa i prostora trećim osobama i ambasadama stranih država u BiH na nekomercijalnoj osnovi.

Operacije humanitarnog deminiranja i protivminskih akcija

- Operacije humanitarnog deminiranja se provode kontinuirano tokom cijele kalendarske godine kroz ljetnu i zimsku kampanju deminiranja, gdje su OS BiH neprekidno uključene u ovu operaciju i jedan su od najznačajnijih faktora s više od 20% ukupnih kapaciteta u tom procesu u BiH. Ovaj zadatak OS BiH realiziraju u saradnji i pod stručnim nadzorom Centra za uklanjanje mina BiH (BH MAC). Za period od 2002. – 2015. godine, OS BiH su realizirale zacrtane planove i deminirale su oko 32,5 miliona m² teritorije i pri tome je pronađeno i uništeno preko 6780 različitih neeksplozivnih ubojnih sredstava (NUS-a). U 2016. godini planirano je deminiranje preko 3,30 miliona m² na 71 deminerskom projektu, koji se nalaze na području 37 općina u BiH (21 u FBiH, 15 u RS i 1 u Distrikt Brčko), od čega je realizirano preko 2 002 541 m² ili trenutno oko 60,3 %, pri čemu je pronađeno i uništeno 347 različitih komada ubojnih sredstava od čega 239 komada protivtenkovskih i protivpješadijskih mina i 108 komada NUS-a. U 2016. godini na upotrebu krajnjem korisniku je predato 31 deminersko radilište. OS BiH su trenutno angažirane na 19 deminerskih radilišta širom BiH sa preko 350 deminera. Paralelno sa realiziranjem Godišnjeg plana PMA, zajedno sa pripadnicima EUFOR-a, vršena je i aktivnost upozoravanja na mine u 55 lokalnih

zajednica, gdje je educirano 3 579 civilnih osoba. Cilj je bio da se ugrožene grupe stanovništva na kritičnim područjima ugroženim minama educiraju na posljedice opasnosti od mina, odnosno kako prepoznati i kako ispravno reagirati tokom nailaska na mine. Na ovaj način OS BiH daju puni doprinos implementaciji Strategije protivminskog djelovanja, koja ima za cilj stvaranje konačnog stanja: „Bosna i Hercegovina bez mina do 2019. godine“.

Obuka komandi i jedinica i provođenje koncepta operativnih sposobnosti (OCC&EF)

- OS BiH su i tokom 2016. godine nastavile s kontinuiranim realiziranjem prioritetnog zadatka individualne i kolektivne obuke u skladu sa Smjernicama Načelnika ZŠ OS BiH i odobrenim Godišnjim planom obuke (GPO) OS BiH. Ograničeni resursi podrške obuke su s jedne strane nametnuli potrebu za racionalnim i priuštivim planiranjem obuke, dok se s druge strane zahtijevao što je moguće viši stepen njene realističnosti. Nivo obučenosti i osposobljenosti pojedinaca, komandi i jedinica konstantno napreduje uz istovremeno usvajanje i uvođenje potrebnih i zahtjevnih NATO standarda. Napredak je primjetan na svim nivoima komandovanja i nadzora (C2). Osnov obuke u OS BiH je bio usmjeren na četiri glavna područja: institucionalnu obuku u Centrima za obuku KOiD (po odobrenim planovima i programima u okviru profesionalnog razvoja oficira i podoficira u OS BiH), izvođenje terenskih vježbi s vanjskim ocjenjivanjem, ocjenjivanje po programu koncepta operativnih sposobnosti, zajedničku vježbu OS BiH s EUFOR-om i realizaciju međunarodne vježbe REGEX 16. Kada su u pitanju vježbe, koje su realizirane u BiH, neophodno je istaknuti 3 vježbe pod nazivom „Dinamičan odgovor“ na poligonu Manjača uz učešće sve tri pješadijske brigade OS BiH na kojim je bilo angažirano preko 2 000 pripadnika OS BiH. Radi ušteda i racionalizacije troškova u sklopu tri navedene vježbe realizirana su i ocjenjivanja po OCC E&F konceptu (Operational Capability Concept Evaluation and Feedback) i izvedena je međunarodna vojna vježba REGEX 16. U sklopu realiziranja ocjenjivanja po OCC E&F konceptu uspješno su izvedena NATO ocjenjivanja prvog nivoa (NEL 1-NATO Evaluation) i nivoa 2 (SEL 2 - Self Evaluation). Sve jedinice su uspješno završile planirana ocjenjivanja tokom 2016. godine i spremne su tokom 2017. godine preći na više nivoe ocjenjivanja u skladu sa OCC E&F metodologijom. Kruna njihovog ocjenjivanja bit će završetak četvorogodišnjeg ciklusa obuke (2017. do 2018. godine) kada sve ove jedinice završe posljednji nivo ocjenjivanja (NEL 2) i time dobiju status borbeno spremnih jedinica /*Combat Ready*/ za eventualno učešće u NATO vođenim operacijama. U okviru plana zajedničke obuke OS BiH i EUFOR-a u periodu od 30.09. do 05.10.2016. godine na poligonu „Manjača“ kod Banjaluke realizirana je vježba „QUICK RESPONSE 2016“. U vježbi su učestvovali snage EUFOR-a i snage iz našeg sastava jačine oko 140 pripadnika OS BiH. Ove godine je preko 980 pripadnika OS BiH uspješno učestvovalo na 8 međunarodnih vježbi koje su po različitim NATO programima podrške, dostizanju NATO normi i standarda realizirane u inozemstvu (Njemačka, Italija, Hrvatska, Turska, Grčka, Slovenija, Srbija) i BiH. Ovdje posebno ističemo međunarodnu vojnu vježbu REGEX 16, koja je po prvi put realizirana u BiH, zemlji koja nije članica NATO saveza, a na kojoj je učestvovalo preko 1 000 učesnika. Prihvatanjem domaćinstva, organizacije i izvođenja ovako složene vježbe svojevrsno je priznanje MO i OS BiH na postignućima u procesu približavanja euroatlantskim asocijacijama i institucijama.

Učešće u operacijama podrške miru i mirovnim misijama UN

- Oružane snage nastavile su s angažiranjem u mirovnim misijama i operacijama podrške miru širom svijeta, čime se nastavlja graditi ugled BiH kao odgovorne članice međunarodne zajednice, spremne djelovati u cilju postizanja globalne sigurnosti. Na taj način Oružane snage doprinose izgradnji međunarodnog mira, stabilnosti i povjerenja u svijetu, te razvijaju svoju sposobnost i interoperabilnost. Do danas kroz naprijed navedene misije je učestvovalo preko 1 200 pripadnika iz sastava OS BiH. Oružane snage BiH, u skladu s važećim zakonskim procedurama, trenutno u operaciji podrške miru Odlučna podrška učestvuju sa 55 pripadnika OS:
 - Pješadijska jedinica OS BiH za osiguranje baze jačine 45 pripadnika OS BiH koja je angažirana s OS SAD. Trenutno se u misiji nalazi IV rotacija.
 - Osmam štabnih oficira u sastavu TAAC Sjever (Komanda za savjetovanje, pomoć i obuku Sjever) s partnerima iz Njemačke. Trenutno se u misiji nalazi V rotacija.
 - Dva podoficira u sastavu TAAC Sjever (Komanda za savjetovanje, pomoć i obuku Sjever) su u zajedničkom angažiranju sa članicama A-5, gdje je vodeća nacija Hrvatska. Trenutno se u misiji nalazi IV rotacija.

S ponosom možemo naglasiti da je učešće naših pješadijskih jedinica i štabnih oficira u misiji ISAF više puta do sada, od strane američkih i njemačkih partnera, ocijenjeno kao izuzetno uspješno s visokim ocjenama za iskazanu profesionalnost i odgovornost u izvršenju dodijeljenih zadataka.

- Pored učešća u operacijama podrške miru, OS BiH izvršavaju mirovne operacije pod okriljem UN-a sa 7 pripadnika OS BiH:
 - Pet pripadnika OS BiH u misiji u Kongu (MONUSCO). Trenutno se u misiji nalazi XIV rotacija.
 - Dva pripadnika OS BiH u misiji u Maliju (MINUSMA). Trenutno se u misiji nalazi II rotacija.

Posebno želimo istaknuti činjenicu da za vrijeme angažiranja u operacijama podrške miru - mirovnim misijama van BiH, nismo imali ni jedan vanredni događaj i da su se svi naši pripadnici vratili živi i zdravi svojim domovima, porodicama i u njihove matične jedinice.

Međunarodna saradnja

- Oružane snage BiH nastavile su svoju uspješnu saradnju s mnogim međunarodnim organizacijama i institucijama, ali je potrebno istaknuti značajnu podršku od strane NATO štaba u Sarajevu i EUFOR-a, dok se sa drugim međunarodnim subjektima uspostavlja bliska saradnja bilateralnim i unilateralnim sporazumima. Tokom 2016. godine, bilateralna vojna saradnja ostvarena je sa 30 država. Ostvarena je kontinuirana bilateralna i multilateralna saradnja s oružanim snagama iz 30 država, zemalja regije, zemljama članica EU, SAD-a (posebno Nacionalnom gardom američke savezne države Maryland) i oružanim snagama drugih država. Posebno ističemo bilateralnu vojnu saradnju sa SAD-om i oružanim snagama zemalja iz regije. Tako je u saradnji sa SAD-om, kroz M2M program u 2016. godini, koji je obuhvatao 108 događaja, od kojih je 74% realizirano, prošlo 726 učesnika OS BiH. Sličan opseg saradnje očekujemo i u narednoj godini. OS BiH multilateralnu saradnju s oružanim snagama drugih država ostvaruju posebno kroz aktivno učešće kroz regionalne inicijative: Američko-Jadransku povelju (A-5), Forum načelnika generalštabova oružanih snaga balkanskih zemalja (B-9), sastanake Zamjenika načelnika generalštabova za operacije u okviru inicijative ministara odbrane Jugoistočne Evrope (SEEDM) i druge zajedničke projekte, kao i vježbe koje se

realiziraju pod okriljem navedenih regionalnih inicijativa. Tako su ove godine Ministarstvo odbrane i Oružane snage BiH bile domaćin održavanja 22. Godišnje konferencije Međunarodne asocijacije centara za obuku za operacije podrške miru (IAPTC) na kome je učešće uzelo 203 učesnika iz 52 zemlje i 128 organizacija širom svijeta, što govori o značaju ove konferencije na međunarodnom nivou, kao i sastanku Zamjenika načelnika generalštabova zemalja članica Inicijative ministara odbrane zemalja Jugoistočne Evrope (SEDM DCHOD).

Tokom ove godine godine, pripadnici OS BiH su učestvovali na događajima multilateralnog karaktera, i to: 20. Konferenciji načelnika glavnih štabova zemalja članica A5 inicijative, na sastancima Implementacijske radne grupe u okviru A5 regionalne inicijative, sastanku Načelnika logistike zemalja članica A5 inicijative, Sastanku prvih narednika zemalja članica A5 inicijative, 9. Konferenciji načelnika štabova balkanskih zemalja, sastancima Koordinacijske grupe u okviru B9 regionalne inicijative, sastancima Podgrupa za edukaciju obuku i vježbe u okviru B9 regionalne inicijative, Podgrupe za Asimetrične prijetnje u okviru B9 regionalne inicijative, Sastanku zamjenika načelnika štabova za operacije u okviru SEEDM regionalne inicijative, te vježbama: „PLATINIUM WOLF 16“, „SABER JUNCTION 16“, „IMMEDIATE RESPONSE 16“, „REGEX 16“, „TRIDENT JUNCTURE 16“ i „BALKAN SHIELD 16“.

Rješavanje viškova naoružanja, municije i MES-a

- Viškovi neperspektivnog i nestabilnog naoružanja, municije i minsko-eksplozivnih sredstava (MiMES-a) već duži niz godina predstavljaju svojevrsni balast i potencijalnu opasnost, kako za pripadnike OS BiH, tako i za građane BiH, pa i šire regije, pri tom imajući u vidu rizik od proliferacije, odnosno krijumčarenja naoružanja i MiMES-a. Intenzivne aktivnosti, koje su Ministarstvo odbrane i Oružane snage BiH zajedno s međunarodnim partnerima, poduzimale prethodnih godina nastavljene su i tokom ove godine, a ostvareni rezultati ukazuju na veći intenzitet nego u prethodnom razdoblju. Uloženi su ogromni naponi kako bi se proces rješavanja viškova i neperspektivnog naoružanja i MiMES-a ubrzao. Nastavljena je intenzivna saradnja s međunarodnim organizacijama i institucijama, prije svega EUFOR-om i NATO štabom u Sarajevu, kao i Misijom OSCE-a u BiH, UNDP-om, te ambasadama SAD-a, Švicarske, Švedske, Norveške, Austrije i drugih zemalja koje nam svojim donatorskim sredstvima pomažu u realizaciji procesa rješavanja viškova. Sve ovo ukazuje na odlučnost svih aktera u procesu da se započete aktivnosti završe u što je moguće bržem roku. Mnogo je prepreka i izazova, aktivnosti su kompleksne, te je stoga uloženo mnogo napora u njihovoj realizaciji gdje je sigurnosni faktor uvijek na prvom mjestu. Ministarstvo odbrane i Oružane snage BiH su u ovom segmentu tokom godine bile usredotočene na nastavak realizacije procesa demilitarizacije municije u vojnim kapacitetima te izvršenju 100%-nih inspekcija na lokacijama skladištenja municije i MES-a. Planom operacija sa municijom i MES-om za 2016. godinu je planirano da se ukupno demilitarizira 2 746 tona municije, od čega u vojnim kapacitetima 2 200 tona, a u civilnim kapacitetima 546 tona. Dosadašnja realizacija pokazuje da je demilitarizovano u vojnim kapacitetima „RzOiU SiMES“ Doboj i poligonu „Glamoč“ (vojni kapaciteti) oko 1 540 tona municije. U istom periodu je u civilnim kapacitetima, preko UNDP-a, demilitarizovano oko 36,6 tona raketa. Do je sada sveukupno demilitarizovano oko 1.577 tona municije. Kada se tome doda da smo uz pomoć Ambasade SAD-a realizirali donaciju oko 565 tona municije vladi Iraka kao doprinos BiH međunarodnoj koaliciji u borbi protiv terorizma, da je u civilne kapacitete preduzeća „Sprewerk“ Gospić, Hrvatska, kroz projekat UNDP-a, transportirano i u toku demilitarizacija oko 153 tone municije punjene bijelim fosforom, za očekivati je realizaciju planiranog do kraja godine.

U cilju cjelovitog i sveobuhvatnog pristupa rješavanju viškova municije i MES-a, nastavljeno je s intenzivnim aktivnostima i ostvaren je napredak na utvrđivanju kvantitativnog i kvalitativnog stanja municije na lokacijama OS BiH (tzv. 100%-tne inspekcije). U proteklom periodu 2016. godine, inspektirali smo 5 449 tona municije ili 34 951 464 različitih vrsta i komada municije i MES-a, što ukazuje na daljnji napredak u ovoj oblasti. U sklopu istog su prikazani i rezultati ciljanog KTP-a avio-municije koja se ispaljuje iz letjelica, a koji su izvršili pripadnici EOD Air Force tima Ujedinjenog Kraljevstva tokom mjeseca august-septembar na 3 lokacije OS BiH u količini od oko 264 tone. Angažiranje UK Air Force tima je realizirano posredstvom EUFOR-a, obzirom da OS BiH ne raspolažu s obučanim ljudstvom za KTP-ove vrste municije. Inspekcije su tokom godine vršene na ukupno 10 lokacija i to: Gabela, Duži, Bačevići, Krčmarice, Blažuj, Kozlovac, Kula, Krupa, Rudo i Blažuj.

- U 2016. godinu smo ušli sa 35 inspektora za vršenje KTP-a, a planirane su i realizirane nove obuke dodatnog broja inspektora, kao i doobuka EOD tehničara. U ovom momentu je obuku za KTP inspektore završilo ukupno 42 pripadnika OS BiH, a kao dodatno – pomoćno osoblje je obučeno još 7 pripadnika EOD jedinice. Pored toga su u organizaciji MTT/EUFOR-a i sekcije za municiju pri KOiD-u realizirana i dva kursa u „RzOiU SiMES“ Doboju u vezi delaboracije MiMES, gdje smo obučili 20 pripadnika čime stvaramo pretpostavke za nesmetanu daljnju realizaciju aktivnosti na delaboraciji municije u vlastitim kapacitetima.

Paralelno sa 100%-nim inspekcijama, nastavili smo i sa vršenjem ispitivanja hemijske stabilnosti baruta, korištenjem mobilnih kompleta opreme doniranih od strane Austrije i nakon provedene obuke pripadnika OS BiH za rad sa istima. U dosadašnjem radu na ispitivanju baruta je izvršeno uzorkovanje oko 450 serija baruta te do sada određene kategorije za 185 uzoraka. Na osnovu rezultata testiranja baruta dobijeni su podaci o nestabilnim serijama municije te stabilnim serijama municije za period od 2 ili 4 godine. Time smo dobili pouzdanije podatke o stanju testirane municije u odnosu na podatke dobijene samo vizuelnim uvidom u stanje istih, te učinili daljnji napredak ka željenom cilju, odnosno kompletno uspostavljenom procesu upravljanja životnim ciklusom municije.

- Svjesni smo činjenice da samo utvrđivanjem tačnog broja i stanja svih količina perspektivnog, ali i neperspektivnog naoružanja, municije i MES-a možemo doprinijeti konačnom rješenju ovog važnog logističkog i sigurnosnog pitanja kako za oružane snage tako i za lokalne zajednice i građane BiH. S izvršenjem ove važne zadatka odlučno i intenzivno nastavljamo i u 2017. godini s namjerom da iste završimo do kraja maja, a što će predstavljati jedan od najvažnijih prioriteta našeg rada i u budućnosti.

Personalni menadžment i podmlađivanje kadra OS BiH

- Proces prijema i otpuštanja personala OS BiH je stalni proces koji je neophodan za funkcioniranje OS BiH. Trenutno brojno stanje OS BiH iznosi 89,74 % popunjenosti od odobrenog.

U 2016. godini, na osnovu penzionisanja i prestanka PVS po drugim osnovama, do 07.11.2016. godine penzionisano je 57 lica i to 42 oficira, 10 podoficira i 2 vojnika i 3 civilna lica.

U PVS OS BiH u 2016. godini primljeno je 193 vojnika, a trenutno je na obuci 18. klasa u COO Pazarić, gdje se na obuci nalazi 285 kandidata, a svi koji uspješno završe obuku potpisat će ugovor o prijemu u PVS s 01.01.2017. godine. Kad govorimo o prijemu mladih oficira iz građanstva u 2016. godini primljeno je 13 lica u PVS, a 31 kandidat III klase koji se nalazi na obuci u CPR Travnik, po uspješnom završetku obuke trebao bi potpisati ugovor o prijemu u PVS na dan 01.01.2017. godine.

Pored prijema oficira iz građanstva, na osnovu javnog konkursa vrši se i prijem kadeta nakon završetka vojnih akademija (VA) u inozemstvu. U 2016. godini po završetku VA u inozemstvu primljeno je 9 oficira. Trenutno se na vojnim akademijama van BiH nalazi ukupno 81 kadet (Makdeonija 9, Turska 32, Velika Britanija 7, Grčka 7, Srbija 17, Hrvatska 8 i SAD 1).

- Usavršavanje personala se svodi na edukacije i obuke u zemlji i van zemlje te se na osnovu toga na 482 aktivnosti tokom 2016. godine usavršavalo 2 700 lica (oficira 1 512, podoficira 582, vojnika 572 i CO 34).

Kad je riječ o školovanju van BiH, trenutno se van zemlje školuju 102 lica. U cilju popune trenutno upražnjenih 55 formacijskih mjesta pilota i 32 koja će se osloboditi do 2024. godine penszionisanjem oficira, te održavanjem potrebne operativne sposobnosti u jedinicama brigade ZŠ i PZO, urađen je višegodišnji projekt školovanja za 24 oficira na VA u trajanju od 5 godina i to: u Turskoj 6, Srbiji 6, Hrvatskoj 6, SAD 3 i V. Britanija 3 i 15 kadeta na jednogodišnjem školovanju (Turskoj 3, Grčkoj 6, Crnoj Gori 3 i Hrvatskoj 3).